



ЭФЕСДИЪ АЙИ ХЪУГЪРУДАРИЗ КАГЪАЗ

Му кагъаз Эфес шагъриндариз дибикІнайиб вушра, БицІи Азияйин вари хъугърудариз кІури, Гирами Рюгъну Павелихъди би-кІуз гъитна. Мумкин ву кагъаз Павел Римдиъ душтагъдиъ айи вахтна дибикІнайиб хъузра. Му кагъзиъ Аллагъди адмийир уърх-баъ Месигъдин важиблуваликан ктибтура. Гьаму шибритІиин али Исайихъ хъугънайидарин саб хизандин уъмрикан ктибтура: Аллагъди дурариз, Иса Месигъдихъ хъугърудар вари саб хилси хъуз, дих гъанІну. Дурарин хъугъувалин бин хачрак карсу, хъасин чІиви гъаши Иса Месигъ духъну ккунду. Исайихъ хъугърудар инсандин бедендихъ тевра: бедендин паярихъан, саб хътарди, тмунубдихъан фукІа апІуз даршлуси, Исайихъ хъугънайи ад-мира гъаци ву — сар чан-чаз яшамиш духъну ккундар. Хъугъна-йидарин арайиъ гъарсариз чан йишв ва ляхин а, гъаддиз сарин гъуллугъ тмунуринутІан артухъ вуди гъисаб дапІну ккундар. Хъугънайидарихъан сатІидитІан гъаму дюн'яйиъ айи писвализ къаршу дугъужсвуз шлуб дар. Кагъзин аьхириъ хъугърударин гъар йигъандин месэлийрихъна фикир жалб апІура: мушваъ жиларин ва хпарин, абийир-бабарин ва бицІидарин, гъуллугъарихъ хъайи-дарин ва дурарин хиликк ккайидарин аьлакыйириккан ктибтура. Душваъ, юкьвнаан гъякъвал идибтІну, дюзвалин рукъан палат-диъ учІвну, ижмиди дийигъуз дих апІура.



Месигь – ухъуз тувнайи уж’вал ву

1 ¹Эфесдиь айи Аллагьдин гирами халкъдиз, Месигь Исайихъ хъугъну яшамиш шулайидариз Аллагьдин амриинди Месигь Исайин вакил Павелин терефнаан – ²уж’вал ва мясляаьт учвуз, ихъ Адаш Аллагьдихъан ва Агъа Иса Месигьдихъан!

³Гъит адлу ишри ихъ Агъа Иса Месигьдин Адаш, Аллагь. Дугъу аьршариь ухъуз, Месигьдихъди ухъу саб гъашиган, рюгънан вари ужувлар тувунхъуз: ⁴Дугъу ухъу, Месигьдиь саб духъну, Аллагьдин улихъ гирамиди ва тахсир ктарди яшамиш хъуз дюн’я халкъ апІайиз улихъна ктагъну. Дугъу Чан масанвалиинди, ⁵Чан хушнииндина ниятнинди, Иса Месигьдилантина ухъкан Чаз веледар ктауз улихъмиди къаст дапІнади гъахъну. ⁶Чав ккун гъапІу Месигьдилантина ухъуз туву Дугъан ужувлан вари ад магъа гъамдиь а. ⁷Гъадгъахъди саб гъахъиган, Дугъан ифди ухъу дюрхна ва Аллагьдин аьхир адру уж’вали ихъ гунгъарилан хил алдабгъна. ⁸Думу уж’вал Дугъу ухъуз жумартди тувну. Вари фагъмиинди ва аьгъювалиинди ⁹Дугъу ухъуз Чан хушниинди Чан ниятнан сир ачухъ гъапІну. Думу ният Месигьдиланмина арайиз хуз ккайиб вуйи. ¹⁰Дугъан му ляхнар улупнайи вахтна завариин ва жилариин халкъ дапІнайиб вари Месигьдин гъюкмиккна са-тІи апІбан бадали вуйидар вуйи.

¹¹Гъадгъахъди саб гъахъиган, Аллагьди Чан вари хушниинди ва ниятнинди улихъмиди апІурайи ниятнаь айиси, учу ктагъну. ¹²Му мици учу, Месигьдик сифте миж кивну, адлу духънайи Аллагьдин тярифар апІуз гъабхъиб ву. ¹³Гъаци учвура, учвуз уьрхювал тувру гъякъвалин гаф – Ужувлан хабар гъеебхъиган, Месигьдик ктикъунчва. Дугъахъ хъугъиган, Аллагьдин печать гъивунчуин – гаф тувну гъафи Гирами Рюгъ. ¹⁴Гъадму Гирами Рюгъ ухъуз тувнайиган, адлу духънайи Аллагьдин тярифар апІуз ухъуз ирс рубкъруб ва ухъкан Чан адмиийр ктаьруб аьгъяхъуз.

Павел хъугърударихъан ккарагура

¹⁵Магъа гъаддиз, Агъа Исайихъна айи ичв хъугъуваликан ва Аллагьдин вари гирами халкъдихъна айи ичв масанваликан узуз гъеебхъиган, ¹⁶йиз ккарагбарийь учву кІваин апІури, Аллагьдиз гъаммишан учвхъанди баркаллагъ кІураза. ¹⁷Ихъ Агъа Иса



Месигьдин Аллагьди, адлу Адашди, фагьум туврайи Рюгь ва Чан гьавриь ахьуз шлу ачмиш'вал учвуз тувуз кІури, узу сикин дарди ккарагураза. ¹⁸⁻¹⁹Узу, Аллагьди ичв юкІвариз гьякь рябкьювал туври, кІури, ккарагураза. Гьадмуган, Чав дих дапІну, учвуз тувнайи гьадму умуд фу вуш, Аллагьдин гирами халкьдиз ирсди рубкьру аднан девлет фукьан зурбади вуш, ва ухьуь, Дугьан кьадарсуз кьувватнан кюмекниинди хьугьнайи адмийириь айи ебцуз даршлу Дугьан кьудратнан зурбавал фукьануб вуш, агью хьибдичвуз. ²⁰Гьадму кьувватнан кюмекниинди Аллагьди Месигьдиь, Думу чІиви гьапІган, гьяракат ипнийи ва аьршариь Чан арччул хилихьинди, ²¹рюгьнан дюн'яйин вари аьхюдартІан, гьюкумдрартІан, агьйиртІан, ва неинки гьаму, хьа гьюз ккимбу уьмрариьра кІваина хру заан ччвурартІан зиина дитнийи. ²²Аллагьди вари Месигьдин ликариккна гьабхну. Думу, вари гьурдаь Дибиснайир, вари дюн'яйиь хьугьнайидарин Аьхюрди дерккну. ²³Дурар сатІиди Гьадгьан беден, варишвариь ва варибдиь вуйи Гьадгьан тамамвал ву.

Аьжалихьан уьмрихьна

2 ¹Учву ичв тахсарна гунгьарилантина дийихнайидар вуйчва ²ва, гьаму дюн'яйиь фици апІури гьахьнуш, учвуралагьдиз кьаршуди удучІвнайидариь айи рюгьнан гьавайиь айи чІуру кьувватарин аьхюрин хиликкди гьаци апІуйчва. ³Саб вахтназ ухьура гьацдар вуйхьа ва, бедендиз ккуниси, ихь тямгьярин ва ихь чІуру ниятарин ляхнар апІуйхьа. Варидарихьди ухьузра, ихь хасиятназ дилигну, Аллагьдин хьял ккилибгурайи. ⁴Хьа, зурба рягьим айи Аллагьди Чан зурба масанвалиинди ккун гьапІунхьу. ⁵Гьаддиз ухьу ихь тахсарилантина дийихнайидар вуйишра, Месигьдихьди чІиви гьапІунхьу. Гьадгьан ужувлиинди дюрхнайидар вучва. ⁶Аллагьди ухьу Месигьдихьди чІиви гьапІну ва Иса Месигьдиь саб духьнайи ухьу аьршариь дитну. ⁷Гьаци Дугьаз Иса Месигьдилантина гьюз ккимбу вахтари ухьуз тувру Чан ужувлан кІан-кІул адру девлет варидариз улупуз ккун гьабхьну. ⁸Гьаддиз Аллагьди учвуз Чан уж'вал тувну, ичв хьугьувалилантина гьюрхюнчву. Ичв дюрхнайивал ичв гьунар дар, хьа – Аллагьдин багьиш ву. ⁹Учву, учву гьапІу ляхнариз дилигну, дюрхнадар. Гьаддиз, ич ляхнариз лигну,



гъюрхюнча, кІури, фурс мапІанай! ¹⁰ Аллагъди ухъуз дерккнайи жувлан ляхнар тамам апІуз, ухъу Иса Месигъдиъ саб дапІну, халкъ дапІнайидар вухъа.

Месигъдиъ сатІи вуйидар

¹¹ Гъаддиз кІваинди гъитай: учву бабкан аллагъсузарди гъахъунчва. Адмийирин хилари бедендин суннат апІру аьдат гъапІдари учвуз «кададабтІдар» кІури шуйчвуз. ¹² Думу вахтари учву Месигъ хътарди гъахъунчва. Учву Аллагъдин халкъ вуйи Израиларик кахърайидар дайчва. Гирами Йикърариъ Аллагъди тувнайи гаф учвуз кайиб дайи. Учву му дюн'яйиъ миж ктарди, я Аллагъ адарди яшамиш шулайидар вуйчва. ¹³ Хъа гъамус учву, Месигъ Исайикди ктикъган, саб вахтна Аллагъдихъан ярхла айидар, Месигъдин учвхъанди удубзу ифдиинди багахъ гъахъунчва.

¹⁴ Месигъди ухъу, жугъдар ва жара халкъар, саб мясляаьтназ гъахну ва къюбдикан саб гъапІну; Чан жан гъурбан дапІну, ихъ арайиъ дийибгънайи цал, яни ухъу жара апІурайи душманвал адабгъну. ¹⁵ Дугъу аьдатарна къайдйир хъайи Къанун арайиан идипну. Дугъан метлеб – Чаъ сатІи дапІну, къюбдикан цІийи халкъ дапІну, мясляаьт ипуб ву, ¹⁶ къюридра саб халкъси, хачриин гъабхьи ккадаъру Чан аъжалилантина Чаинди душманвал терг дапІну, Аллагъдихъди мясляаьтназ хуб ву. ¹⁷ Думу дугъну, учвуз, Аллагъдихъан ярхла айидариз, ва Дугъаз багахъ хъайидариз мясляаьтнакан хабар дебккну. ¹⁸ Гъаддиз Гъадгъулантина ухъуз, жугъдариз ва миди вуйи халкъариз, сар Рюгъну сатІи дапІну, аьршарин Адашдихъна гъюз ихтияр дубхънахъуз.

¹⁹ Гъаци вуйиган, учву сарун жарадар ва гъирагъдилан дарчва. Учву Аллагъдин гирами халкъдизстар ихтиярар айи саб пай вучва ва Дугъан хизандин адмийир вучва. ²⁰ Учву вакиларина пайгъамбрари ккивнайи шибритІин бина ккебгънайидар вучва. Гъадму шибритІин сабпи ва мурчван Гъван – Месигъ Иса Учв ву. ²¹ Дид'ин ягъал-ягъал шулайи ва Агъайиз бахш вуйи, гирами дараматдиз илтІибкІурайи мюгъкам хал дийибгъна. ²² Дидиъ учвкан Чан Рюгъниинди Аллагъ яшамиш шлу ужагъ шула.



Аллагьсузарин арайиь Павелин ляхнар

3 ¹Магьа гьаддиз узу, Павел, учву, аллагьсузар бадали, Месигь Исайиланмина дустагьдиь аза.

²Учвуз, икибаштІан, Аллагьди узуз Чан уж'вал учвуз улупуз табшурмиш дапІнайиваликан деебхьначвуз. ³Дугьу узуз Чан сир ачухь гьапІунзуз, узу дидкан учвуз жикьиди гьибикІнийза. ⁴Гьаму гьурхиган, Месигьдин сирнакан узуз фу аьгьяш, йиз аьгьюваларикан учвхьанра аьгью апІуз шулчвухьан. ⁵Му сир аьгью хьуб гьамусдизкьан айи инсаниятдиз тувнайиб дайи. Хьа гьамус Рюгьну Аллагьдин гирами вакиларизна пайгьамбрариз думу аьгью гьапІну. ⁶Думу сир магьа гьаму ву: жугьдарихьди сабси жугьуд дарударра, Ужувлан хабарнахь хьугьну, Аллагьдин ужувлан ирсчйир ву ва дурарихьди сабси саб бедендик ктикьура. Иса Месигьдик ктикьрудариз тувнайи гафнакан гьадраризра ка.

⁷Аллагьдин кьувватну узуз тувнайи ужувлиинди гьадму Ужувлан хабар рабгьру гьуллугьчи духьназукан. ⁸Узуз, Аллагьдин халкьдин арайиь варитІан асккануриз, гьаму багьиш тувнауз: Аллагь аьгьдрудариз ебцуз удудубкьру Месигьдин девлетнакан Ужувлан хабар дебккуб. ⁹Вари халкь гьапІу Аллагьди сифте бинайиан жиниди уьбхюрайи гьадму ляхнин гьякьнаан варидариз аьгьювалар арццу багьиш тувнауз. ¹⁰Гьадму ляхнин метлеб: гьарсаб жюрейиинди арайиз удубчІвру Аллагьдин фагьум вари дюн'йиь айи Месигьдихь хьугьнайидарилантина аьршариь айи аьхюдариз ва гьюкмариз гьамус ачмиш дубхьну ккунду. ¹¹Му Дугьан ихь Агьа Иса Месигьдиинди тамам гьапІу гьаммишандин ният ву. ¹²Месигьдиь саб духьну ва Гьадгьахь хьугьну, ухьхьан, гучІ ктарди ва саб шак адарди, Аллагьдихьна гьюз шулу. ¹³Гьаддиз, учву бадали узу аьзабарикк ккахьна кІури, ккун апІу-раза, юкІв макадабтІанай, дурар ичв адлувализ ву.

Месигьдин масанвал

¹⁴Гьаддин бадали узу Адашдин улихь, кьамкьариинди ккарагури, дийигьназа. ¹⁵Гьадгьухьан завариин ва жилариин гьарсаб тухми ччивар дисура. ¹⁶Узу, Аллагьди Чан аднан булвалиан Чан Рюгьниинди ичв рюгь кьувватлу апІуз, ¹⁷хьугьувалиинди ичв кІваь Месигь учІвуз, ичв уьмрин ччивна шибритІ масанвал хьуз,



¹⁸ Аллагьдин вари гирами халкъдихъди учвур Месигьдин масан-валин яркъушнан, ярхишнан, ягълишнан ва деринвалин гъавриь ахъуз, ¹⁹ учвуз инсандин фагъмиь удрубшру гъадму масанвал аьгью хъуз, ичв уьмур Аллагьдин тамамвалихъди абцІуз ккарагураза.

²⁰ Хъа, ухъуь Чан къувват гъяракатнаъ ипну, ухъу ккун апІруб-тІан вая ккунийкІан, кІурубтІан гизаф артухъ тувуз Шлуриз, ²¹ гъит, Иса Месигьдилантина ва вари дюн'яйин хъугьрудари-лантина гъаммишандиз наслариан наслариз ад ибшир! Амин.

Рюгънан сабвал

4 ¹ Узу, Агъайин тереф дибисна кІури дустагъдиь айири, мин-нат апІуразачвуз: Аллагьди учвуз дих дапІнайи гьуллугъназ лайикъ вуйиси яшамиш йихъай. ² Дамагъсузди ва гъюдалди гъузай, чиб-чпихъна сабурлуди ва масанди йихъай. ³ Вари къувват жалб дапІну мясляьтнахъди рюгънан ичв сабвал йибтІай. ⁴ Рюгъ сар ву, Месигьдин беденра саб ву ва, гъадрарси, Аллагьди учвуз дих дапІнайи умудра саб ву. ⁵ Сар Агъа, саб хъугъувал, ухъу вари штуан хъувалин метлебра саб ву. ⁶ Айир – сар Аллагъ. Думу вари-дарин Адаш ву. Думу ихъ варидарин зиин Алир ву, Дугъан лях-нар ухъ'инди варидариинди ву, ва Думу ухъуь варидариь яша-миш шула.

⁷ Месигьди улупнайи къадарниинди ухъуз гъарсариз хъуркъувал гъазанмиш апІуз шлу багъиш тувнахъуз. ⁸ Гъаддиз дибикІнура а:

«Чахъди къадарсуз йисирар хъади,
Думу гъалибвалиинди кІакІназ удучІвну,
ва Чан адмийириз багъишар тувну».

⁹ «КІакІназ удучІвну» кІуру гафну мугагъназ Думу исина, жи-лин кІанакк йишвариз гъювал улупура. ¹⁰ Чахъди вари дюн'я абцІбан бадали аьршартІан зиина за Гъашир, гъадму исина Гъу-шур ву. ¹¹ Ари Гъадму ву багъишар Тувур: фужариз – вакилар хъуб, фужариз – пайгъамбрар, фужариз – Ужувлан хабар ктибт-рудар, фужариз – хъугьрударин аьхюдар ва мялимар хъуб. ¹² Ми-ци, Аллагьдин гирами халкъ, Месигьдин беден артмиш апІуз гьуллугъназ гъязур апІбан бадали, гъабхъну. ¹³ Му мици, ихъ хъу-гъувалиь ухъу вари саб хъайизкъан, Аллагьдин Бай аьгью апІа-йизкъан, рюгънаъ хъуркъувалихъна гъайизкъан ва вари тамамвал Айириз – Месигьдиз ухъу ухшар шайизкъан хъибди.



¹⁴Хъа думуган ухъу сарун лепйири ккалакъурайи ва гъар жюре каламарин микІарихъ гыитнайи, инсанар улдугуз гыитри, аьмалдар кучІляхърикк ккахъру бицІидарси хьидархъа. ¹⁵Эгер ккунивалиинди гъакъ'вал кІури гъабхъиш, варибдин кІул вуйи Месигъдин хасиятназ ухшарди ухъу аьхю хьидихъа. ¹⁶Гъадгъан кюмекниинди вари беден саб дубхъна ва гъар жюре аьлакъйири кибтІна, дидин вари паяри гъарсабди чаз улупнайиб тамам апІура. Гъамци вари беден аьхю ва масанвалиъ артмиш шула.

Йирси ва цІийи уьмур

¹⁷Гъаци вуйиган узу Агъайин ччвурнахъан кІураза, тІалаб апІураза: ичІи фикрар айи аллагъсузарси яшамиш хъуб дипай. ¹⁸Дурарин фагъум рюгънан курвалиан ва юкІвар дициркънайивалиан мучІу дубхъна, дурар Аллагъди тувру уьмрихъан гъадатІна. ¹⁹Дурар, инсанвалин лишан дудубгну, адрацІди, гъубкъу чиркишнаъ арсери, къяппавалиъ ахъра.

²⁰Хъа учвуз Месигъ дици аьгъю гъахъундарчвуз. ²¹Саб шак адарди, Дугъкан учвуз гъеабхъунчвуз ва, Гъадгъан терефкрар вуйивализ дилигну, учвуз гъакъ'вал улупунчвуз, фицики гъакъ'вал Исайиъ а. ²²Ичв йирси табиаьтдиз хас вуйи, улар йитІру кучІлин тямгъяри пуч апІурайи мугагъназдин уьмур гьибтуз учвуз улупнийи. ²³Ичв фикир апІбан саягъ цІийи алапІай, ²⁴Аллагъдин хасият – гъакъ вуйи дюзвал ва гирамивал улупурайи цІийи табиаьт «алабхъай».

²⁵Гъит гъарсари кучІал дипри ва жвуван багахъ хъайидариз дюзвал йипри, гъаз гъапиш ухъу вари саб бедендин паяр вухъа. ²⁶Хъял кубчІвнадигунагъ мапІанай. Гъит ичв хъял ригъ алабхъайиз ккъядьбхъри, ²⁷ичв уьмриъ иблисдиз йишв мутуванай. ²⁸Шли гъитІибкІуйиш, сарун мигъитІибкІан, жвуван хилари гъазанмиш апІин ва адрудариз капІ.

²⁹Гъич сабкъан ахмакъ гаф мапІанай, ужуб рякъюхъ хъаъру ва хъпехърудариз хайирлу гафар йипай. ³⁰Ккадаъру Йигъ гъайиз учв'ин печать йивнайи Аллагъдин Гирами Рюгъназ гирамамапІанай. ³¹КІван гъарсаб къутІкъливалихъан, хъял гъювалихъан, тюнтвалихъан, чІигъарихъан, люкънар-агърарихъан, гъар жюре хъял бисувалихъан азад йихъай. ³²Сар-сарихъна гъюрмат ади йихъай, учву Месигъдиъ саб гъахъиган Аллагъди учвлан фици хил алдабгънуш, учвура чиб-чпилан хил алдабгъури гъузай.



Аквнахь яшамиш шулайиси гъузай

5 ¹Аллагъдин ккуни веледарси, Гьадгъаз ухшар йихъай. ²Кабалгру ицци ниар адаури, Аллагъдиз Месигъ Учв фици гъурбан гъахънуш ва фици ухъу ккун гъапІнуш, гъаци масанди яшамиш йихъай.

³Ичв арайиъ къяппаваликан, вая жара чиркинваликан, ясана тямгъкарваликан гафаркъбан даришри – мурар Аллагъдин гирами халкъдиз хас дар. ⁴Ичв ушвниъ гъич фицикІа лайиъ даруб, ичІи улхуб вая кацІу зарафтар духъну ккундар, Аллагъдиз чухсагъул кІури гъабшиш, ужу шул! ⁵Къяппавалиъ ахъру гъич сар кас, я чиркин кас, я тямгъкар (мицир идолариз икрам апІрурик гъисаб ву) Аллагъдинна Месигъдин Паччагълугъдиъ ирснан эйси хьидар.

⁶Гъит, зиихъ дупнайибдиз къаршу удучІвну, гъич сарира учву алдатмиш дарапІри, гъаз гъапиш мютІюгъ дарудари чпиина Аллагъдин хъял алапІура. ⁷Мицдар адмийрихъди ичв фукІа уртахъуб дарибшри.

Аквнан баяр

⁸Саб ухди учву мучІушин вуйчва, хъа гъамус, учву Агъайиъ саб вуйиган, акв вучва. Аквнан баярси яшамиш йихъай. ⁹Хъа аквнан бегъер – гъяниввал, дугъриввал ва гъякъвал ву. ¹⁰Агъайиз фу къабулди шулуш, аьгъю апІури йихъай. ¹¹МучІушнан бегъерсуз ляхнариъ иштирак махъанай, хъа дураар дюз дарувал улупай. ¹²Дурари жиниди апІурайидарикан пуз гъеле начра шулу. ¹³Хъа вари жиниб аквнахь ачухъ хьибди. ¹⁴Вари рябкъюри апІруб акв ву, гъаддиз гъамци кІурира а:

«Даахнайир, хъирг!

ДукІнайир, гъудужв!

Месигъди уву аквнакк ккаъди».

¹⁵Лигайгъа, ахмакъарси яшамиш махъанай, хъа фагъумлуйирси. ¹⁶Жвуван вахт ужуйи гъапІуз ял апІинай, гъаз гъапиш му йигъарий гизаф писвал а. ¹⁷ПчІу юкІв ади махъанай, хъа Агъа Аллагъдин ният фу вуш, гъаврий ахъуз чалишмиш йихъай. ¹⁸Ички гизаф мубхъанай, диди ягъ-намус дубгуз гъитру, хъа Рюгънахъди ацІай. ¹⁹Чиб-чпихъди Мягълийирин китабдиан тярифнан ва рюгънан



мяълийриинди сюгьбатар апІнай. Ичв юкІвариль Агъайиз мяълийир апІури, Дугъан ад апІнай. ²⁰ Ихъ Агъа Иса Месигъдин ччвур дибисну, Адаш Аллагъдиз гьаммишан ва варибдихъан чухсагъул йипай.

Жилиринна хпирин аьлакыйир

²¹ Месигъдиз айи лап дерин гьюрматнаан чиб-чпиз мютЮгъ йихъай.

²² Учву, хпар, Агъайизси, ичв жиларизра мютЮгъ йихъай. ²³ Гъаз гъапиш Месигъ фици Чан бедендин – вари хьугърударин – КІул ва дурар Уърхрур вуш, жилирра чан хпирин кІул ву. ²⁴ Месигъдиз хьугърудар фици мютЮгъ вуш, ари хпарра чпин жилариз гъаци мютЮгъ духъну ккунду.

²⁵⁻²⁷ Хъа учву, жилар, Месигъди Чахъ хьугърудар фици ккун гъапІнуш, ичв хпарра гъаци ккун апІнай. Дугъу, гафналантинаштуъ марцц дапІну, гирами апІбан бадали, я миж, я камивал, ясана жара фукІа гъациб ктарди, швушвси, чпин вари аднаъди Чан улихъ дерккну Чаз бахш апІбан бадали, тахсир ктру хьугърударин гирами Жямьаът хъпан бадали, хьугърударихъанди Чан жан тувну. ²⁸ Гъаци жиларра, чпин жанар фици ккундуш, чпин хпарра гъаци ккун апІуз буржлу ву. Шлиз чан хпир ккундуш, дугъаз учв ккунду. ²⁹ Хъа мегъел чан жан даккнир гъахъундар, адми дидин гъайгъушнаъ шулу, думу тухъ апІури шулу. Гъаци Месигъра хьугърударин гъайгъушнаъ а, ³⁰ гъаз гъапиш ухъу Дугъан бедендин паяр вухъа. ³¹ «Гъаддиз адми, чан адашна дада гъитну, чан хпирик карсди, ва кьюрикан саб жан хъибди». ³² Мушваъ зурба вуйи сир а, узу кІурайиси, думу сир Месигъдинна вари хьугърударин аьлакыйирикан ву. ³³ Хъа учвуз кайиб, гъит гъар жилири, чаз учв ккуниси, чан хпир ккун апІри ва хпирира чан жилирин гьюрмат уьбхри.

Абийр-бабар ва бицІидар

6 ¹ БицІидар, Агъайихъди гъягърудариз лайикъ вуйиси, ичв абийр-бабарихъ хъпехъури апІнай – му дюзвал ву.

²⁻³ «Уву бахтлу хъпан ва жилиин ярхи уьмур хъапІбан бадали, яв адаш-дадайиз гьюрмат апІин» –



му Аллагды гаф тувнайи сабпи табшуругъ ву.

⁴Адшар, ичв бицидарик хъял макапанай, хъа Агъайин тербияйихъдина насигъатарихъди ижмиди вердиш апІнай.

Эйсийр ва лукІар

⁵ЛукІар, учву Месигъдиз мютІюгъ шлуси, вари юкІв хъипну, гьюрмат ади ва гучІ кади жилин ичв агъйириз мютІюгъ йихъай.

⁶Дурариз учву ккун хъпан бадали, зиълан апІруси мапІанай, хъа юкІв хъипну, Аллагъдин ният тамам апІурайи Месигъдин лукІарси лихай. ⁷Адмийирихъ лихурайиси ваъ, хъа аьршарин Агъайихъ лихурайиси юкІв хъади лихай. ⁸Учвуз аьгъюганси, учв лукІ вушра – даршра, шли ужуб ляхин гъапиш, гьарсаб ляхниз Агъайи пешкеш тувди.

⁹Учвур, агъйир, лукІарихъна гъаци йихъай. ГучІар ккауб гьибтай. Учвуз аьгъюганси, ичвра, дураринра сар Агъа ву аьршарий Айир, хъа Думу гъич саринра тереф бисрур дар.

Аллагъдин рукъан палат алабхъай

¹⁰Аьхирки, Агъайиъ саб хъувалиъ, Дугъан удукъувалиъ ва къуватнаъ ижми йихъай. ¹¹Аллагъди учвуз тувнайи вари яракъ, иблисдин тІулариз къаршу дугъужвуз, алабхъай. ¹²Фицики ухъу дяви йиккканна ифдикан вуйи адмийирихъди гъабхурадархъа, хъа аьхюдарихъдина гъюкумдрарихъди, гъаму мучІушнан дюн'я хилиъ дибиснайидарихъди ва заварий писвалин рюгъярихъди гъабхурахъа. ¹³Ари гъаддиз, писвал алжабгъуз хъюбгъю йигъан учвхъан къаршу дийигъуз, ва кІул адабгъну гъузуз, Аллагъдин вари яракъ учвухъна бисай. ¹⁴Юкъвнаан гъякъвал идибтІну ва дюзвалин рукъан палатдиъ учІвну, ижмиди дийигъай. ¹⁵Ичв ликариин алахърударра, дюн'яйиз Ужувлан хабар гъабхуз, гъязурди ишри. ¹⁶Варибдилан гъайри, иблисдин ца кайи чІимрар кТІуршвуз, хъугъвалин гъалхан ижмиди бисай. ¹⁷Уьрхрувалин рукъан баккара улубкІай ва Рюгънан ханжалра, яни Аллагъдин Гаф гъадабгъай. ¹⁸Гъубкъу жюрейиинди ккарагай ва Рюгънаъди учвуз ккуни вахтна Аллагъдикан тІалаб апІнай. Гъаци хъуз гъязурди ва Аллагъдин вари гирами халкъдихъан гъаммишан ккарагури гъузай.

¹⁹Узу ушв абццубси, лазим гафар тувбан бадали ва Ужувлан хабарнан сир улихъ гучІ ктарди ктибтбан бадали, узхъандира



ккарагай. ²⁰Узу гъеле гъаму зунжрариъ ашра, гъадин гъякънаан гъаънайир вуза. Узу лазим вуйибси дирбашди дидкан хабар дебккбан бадали, узхъан ккарагай.

²¹Узу гъаІраш, Агъайиз дугъривалиинди гъуллугъ апІурайи йиз ккуни гъардаш Тихикди узкан вари пидичвуз. ²²Думу гъадиз учвухъна, ич ляхнарикан ктибтуз ва ичв юкІварик аьшкъ капІуз гъаърайир вуйиз.

²³Гъит, гъардшар, мясляаьт, масанвал ва хъугъвал Адаш Алагъдихъан ва Агъа Иса Месигъдихъан ибшричвуз. ²⁴Зат аьхир адарди ихъ Агъа Иса Месигъ ккуни варидариз уж'вал ибшри.